

Sinerissap qanittuani qaleralinniarnermi Upernaviup, Uummannap Qeqertarsuullu aqutsiveqarfiini aqutsiveqarfiit titartagaanerisa siunnersuutip tunngavilersuutaani allattorsimanerattuut kiisalu ilanngussani (bilag) 1-miit 4-mut titartarsimani malillugit allanngortinneqarnissaat isumageqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasorta, Karl-Kristian Kruse, Siumut)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Aappassaaneerera

Ataatsimiititaliap isumaliutersuussutaanut qujarusuppunga. Maluginiarpara ataatsimiititaq piujuaannartitsinermik tunngaveqarluni atuisoqassasoq pingaartillugu oqariartormata. Ataatsimiititaq oqaatigivaa aqutsiveqarfimmi uumassuseqarnikkut imminut illersorneqarsinnaasariaqartoq aamma siunisamat ungasinnerusumut peqassutsip piujuaannartitsinermillu tunngaveqartumik atuineq isiginngitsuusaarneqassanngitsoq.

Naalakkersuisut ataatsimiititaq piujuaannartitsinermik tunngaveqartumik atuinissamik oqariartuutaat isumaqatigilluinnarpaat taamaammallu aqutsiveqarfimmi Qeqertarsuup Tunuani ersiutaasut pillugit maluginnissimanerannut ataatsimiititaq nersualaarusullugu.

Aalajangiiffigisassatut siunnersuut pillugu Naalakkersuisut malitseqartitsissapput piaartumillu aqutsiveqarfiusuni allannguutaasussanik siunnersuutininik suliaqassallutik, tamatumani immikkut pingaarnertut nakkutilliinikkut aamma uumassuseqarnerup ersiutaanik tunngavilersukkamik kingunerisasaanik isiginnittuusunik suliaqassallutik.

Naalakkersuisut inussiarnersumik maluginiaqqussavaat aalisarnermi inatsimmi aalajangersakkanut Naalakkersuisut pituttugaammata, taakkunanilu Naalakkersuisut ersarissamik pituttorneqarput aalisagaqassutsitta siunertaqartumik aamma uumassuseqarnikkut imminut illersortumik atorluarneqarnissaannik qulakkeerisussaataammata. Inatsisartut nammineq inatsisaanni tamanna ersarilluinnartumik aalajangersarneqarsimasuuvoq.

Naalakkersuisut maluginiarpaat ataatsimiititaliap oqaatigimmagu soorlu Qeqertarsuup tunuani qaleralinniarneq ”ima sakkortutigigunartoq, allaat aalisakkat pilerlaat aatsaat takkuttut aalisarneqartarlutik. Ukiuni 2001-imit 2012-imit qalerallit agguaqatigiisillugu 10 cm-ip missaannik milleriarsimasut, oqimaassutsimikkullu taamaaqataanik 2,5 kg.-imit 1,4 kg.-mut oqileriarsimallutik”. Naalakkersuisut taamaammata mianersornissamat peqqutissaqarluarput. Taamaammata Naalakkersuisut atuisut peqatigalugit taakkorpiaat pillugit nalilersuilluarumapput tassunga ilanngullugit Pinngortitaleriffik kiisalu KANUAANA, taassumalu kingorna allannguuteqartitsinissamik siunnersuuteqarumaarlutik.

Naalakkersuisut paasivaat ataatsimiititaliami amerlanerussuteqartut siunnersuut akuerineqassasoq inassutigigaat.

Ataatsimiititaq suliaq ingerlanneqarneranut atatillugu ataavartumik ilisimatinneqartarumaarput.